



**REPUBLIKA E SHQIPËRISË
AUTORITETI I MBIKËQYRJES FINANCIARE
BORDI**

VENDIM

Nr. 130, datë 26.11.2015

PËR

**MIRATIMIN E DISA SHITESAVE DHE NDRYSHIMEVE NË RREGULLOREN NR. 14,
DATË 25.2.2009 “PËR PARANDALIMIN E KONFLIKTIT TË INTERESAVE
NË USHTRIMIN E FUNKSIONEVE PUBLIKE NË AUTORITETIN E
MBIKËQYRJES FINANCIARE”**

Në bazë dhe për zbatim të nenit 14, pika 7 të Ligjit nr. 9572, datë 03.07.2006 “Për Autoritetin e Mbikëqyrjes Financiare”, i ndryshuar, të nenit 46, pika 1 të Ligjit nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike” me propozim të Drejtorisë së Shërbimeve të Brendshme, Bordi i Autoritetit të Mbikëqyrjes Financiare,

V E N D O S I :

1. Miratimin e disa shtesave dhe ndryshimeve në Rregulloren nr. 14, datë 25.2.2009 “Për parandalimin e konfliktit të interesave në ushtrimin e funksioneve publike në Autoritetin e Mbikëqyrjes Financiare”, sipas materialit bashkëlidhur.
2. Ngarkohet Drejtoria e Shërbimeve të Brendshme për ndjekjen dhe zbatimin e këtij vendimi.

Ky vendim hyn në fuqi menjëherë.

KRYETAR

Pajtim MELANI

DREJTOR I PËRGJITHSHËM EKZEKUTIV

Enkeleda SHEHI

- **Shtesat dhe ndryshimet në Rregulloren nr. 14, datë 25.2.2009 “Për parandalimin e konfliktit të interesave në ushtrimin e funksioneve publike në Autoritetin e Mbikëqyrjes Financiare”:**

Neni 1

Neni 1 ndryshon si vijon:

“Neni 1
Baza ligjore

Kjo Rregullore hartohet në bazë dhe për zbatim të nenit 14 pika 7, të Ligjit nr. 9572, datë 03.07.2006, “Për Autoritetin e Mbikëqyrjes Financiare”, të nenit 46, pika 1 të Ligjit nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike”, i ndryshuar dhe në Ligjin nr. 9049, datë 10.04.2003 “Për deklarimin dhe kontrollin e pasurive të detyrimeve financiare të të zgjedhurve dhe të disa nëpunësve publikë”, i ndryshuar.”

Neni 2

Neni 5 ndryshon si vijon:

“Neni 5
Fusha e zbatimit

Rregullorja përcakton norma të detyrueshme për t'u zbatuar nga:

1. Çdo zyrtar i AMF-së, që ndodhet në pozicione, ka përgjegjësi, kryen detyra ose ushtron kompetenca të llojeve konkrete, të përcaktuara shprehimisht në Ligjin nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike” i ndryshuar dhe në Ligjin nr. 9049, datë 10.04.2003 “Për deklarimin dhe kontrollin e pasurive të detyrimeve financiare të të zgjedhurve dhe të disa nëpunësve publikë”, i ndryshuar;
2. Çdo zyrtar i AMF-së, kur ai merr pjesë në një vendimmarrje për akte dhe kontrata administrative;
3. Çdo zyrtar i AMF-së, kur ai merr pjesë në një vendimmarrje për kontrata, që krijojnë marrëdhënie juridiko-civile, me palë këto subjekte;
4. Personat e lidhur në masën dhe mënyrën e përcaktuar në Ligjin nr. 9367 datë 07.04.2005, “Për parandalimin e konfliktit të interesave në ushtrimin e funksioneve publike”, i ndryshuar, dhe në nenin 30 të Kodit të Procedurave Administrative.”

Neni 3

Në nenin 9, shtohet pika 4 me këtë përmbajtje:

- “4. Drejtori i Përgjithshëm Ekzekutiv, me mbështetjen e Drejtorisë së Shërbimeve të Brendshme, në bazë të vetëdeklarimit të zyrtarit të AMF-së, si dhe në bazë të të dhënave që ka, merr

masat e nevojshme që të shmangë emërimin e një zyrtari në pozicione, në të cilat mund të lindin ose ka konflikte interesash. Drejtori i Përgjithshëm Ekzekutiv merr masa që zyrtarit të mos t'i ngarkohen detyra që mund të çojnë në shfaqjen e një konflikti të mundshëm interesash dhe në rast të kundërt merr masa për largimin e zyrtarit nga detyra.”

Neni 4

Pas nenit 10, shtohet neni 10/1, me këtë përmbajtje:

“Neni 10/1

Lëshimi i autorizimit nga zyrtari i AMF-së

AMF vë në dispozicion të zyrtarëve të saj modelin e autorizimit, në formë e në përmbajtje, që këta duhet të lëshojnë.”

Neni 5

Në nenin 11, tek titulli shtohet togfjalëshi “specialist i burimeve njerëzore”

Neni 6

Pas nenit 15, shtohet neni 15/1, me këtë përmbajtje:

“Neni 15/1

Zyrtarët që mbartin detyrimin për deklarim periodik të interesave privatë

1. Deklarimi i interesave private periodike të zyrtarëve të AMF-së, bëhet në përputhje të kërkesave të Ligjit nr. 9367, datë 07.04.2005 , i ndryshuar dhe Ligjit nr. 9049, datë 10.04.2003 “Për deklarimin dhe kontrollin e pasurive, të detyrimeve financiare të të zgjedhurve por dhe të nëpunësve publik”, i ndryshuar.
2. Zyrtarët e AMF-së, të cilët janë të detyruar të bëjnë deklarim të interesave private periodike janë:
 - a) Drejtori i Përgjithshëm Ekzekutiv;
 - b) Nëndrejtori Ekzekutiv;
 - c) Kryetari i Bordit;
 - d) Anëtarët joekzekutivë të Bordit;
 - e) Drejtor Departamenti;
 - f) Drejtor Drejtorie;
 - g) Këshilltar.
3. Gjithashtu, në zbatim të nenit 21 dhe 22 të Ligjit nr. 9049, datë 10.04.2003 “Për deklarimin dhe kontrollin e pasurive të detyrimeve financiare të të zgjedhurve dhe të disa nëpunësve

publikë”, i ndryshuar, mbartin detyrim për deklarim të interesave private dhe periodike bashkëshorti/ ja, bashkëjetuesi/ja dhe fëmijët madhorë të zyrtarëve të AMF-së, të përcaktuar në pikën 2 të këtij neni, edhe kur këta të fundit nuk janë në të njëjtën gjendje familjare me zyrtarin.”

Neni 7

Neni 16 ndryshon si vijon:

“ Neni 16

Kufizimi i interesave privatë për parandalimin e konfliktit rast për rast të interesit për çështje të veçanta

1. Drejtori i Përgjithshëm Ekzekutiv dhe Nëndrejtori Ekzekutiv në AMF:

- a) Nuk mund të ushtrojë asnjë funksion tjetër publik;
- b) Nuk mund të ushtrojë asnjë veprimtari tjetër fitimprurëse, me përjashtim të mësimdhënies;
- c) Nuk mund të jenë të angazhuar në funksione drejtuese partiake;
- d) Nuk mund të zotërojnë aksione ose pjesë të kapitalit në asnjë nga subjektet e mbikëqyrura;
- e) Nuk mund të ushtrojnë veprimtari private, që krijojnë të ardhura në formën e personit fizik tregtar, ortakëri personash fizikë tregtarë të çdo forme, si dhe profesione të lira të avokatisë, noterisë, ekspertit të licencuar, si dhe të konsulentit, agentit a përfaqësuesit të organizatave të përcaktuara në shkronjën "e" të këtij neni;
- dh) Nuk mund të lidhin kontrata ndërmjet, çdo institucioni publik nga njëra anë dhe nga ana tjetër shoqërisë/ve tregtare, shoqërisë së thjeshtë a ortakërisë, në të cilën, Drejtori i Përgjithshëm Ekzekutiv dhe Nëndrejtori Ekzekutiv zotërojnë aksione ose pjesë në kapital, pavarësisht nga sasia e aksioneve ose pjesëve të kapitalit që zotërojnë;
- f) Nuk mund të lidhin kontrata ndërmjet një institucioni publik nga njëra anë dhe një individi, personi fizik a juridik, apo ndonjë formë tjetër ortakërie, nga ana tjetër, kur, Drejtori i Përgjithshëm Ekzekutiv dhe Nëndrejtori Ekzekutiv kanë një interes privat, sipas përcaktimeve të nenit 30 të Kodit të Procedurave Administrative.

2. Zyrtarët e tjerë të Autoritetit të Mbikëqyrjes Financiare:

- a) Nuk mund të jenë anëtarë në organet drejtuese të një shoqërie tregtare kur:
 - i) Këta ushtrojnë veprimtari në një sferë që përputhet ose pritet me sferën e juridiksionit të zyrtarit dhe të kompetencës së tij për të vepruar;
 - ii) Me akte të nxjerra nga ai;

- iii) Ose kur zyrtari ka rol thelbësor dhe përcaktues në nxjerrjen e këtyre akteve, me akte të cilat krijojnë pasoja juridike, përfitime ose kosto mbi këto shoqëri a organizata apo mbi shoqëri ose organizata të tjera që bashkëpunojnë ose konkurojnë me shoqërinë në fjalë, përjashtuar rastet kur ky pozicion në shoqëri ose organizatë vjen për shkak të funksionit dhe/ose të statusit.
- b) Nuk mund të jenë të punësuar, me kohë të plotë apo të pjesshme, në një detyrë tjetër, në një nga subjektet e mbikëqyrura;
- c) Nuk mund të zotërojnë në mënyrë aktive, aksione ose pjesë në kapital të një shoqërie tregtare, në rastet kur shoqëria ushtron veprimtari në një sferë që përputhet ose pritët me sferën e juridiksionit të zyrtarit dhe të kompetencës së tij për të vepruar, me akte të nxjerra nga ai, ose kur zyrtari ka rol thelbësor dhe përcaktues në nxjerrjen e këtyre akteve, të cilat krijojnë pasoja juridike, përfitime ose kosto mbi këto shoqëri apo mbi shoqëri të tjera, që bashkëpunojnë ose konkurrojnë me shoqërinë në fjalë, rast në të cilin zyrtari mund të zotërojë aksione ose pjesë në kapital vetëm, në përputhje me kushtet e përcaktuara në shkronjën "c" të nenit 27 të Ligjit nr. 9367, datë 07.04.2005 "Për parandalimin e konfliktit të interesave në ushtrimin e funksioneve publike", i ndryshuar.

3. Pavarësisht përcaktimeve të mësipërme, ndalohet lidhja e kontratave ndërmjet AMF-së, nga njëra anë dhe një individ, personi fizik a juridik, apo ndonjë formë tjetër ortakërie, nga ana tjetër, kur plotësohen, njëkohësisht, kushtet e mëposhtme:

- a) Zyrtari i AMF-së ka kompetencë thelbësore dhe përcaktuese në vendimmarrjen e procesit të vlerësimit të ofruesve dhe të ofertave apo në përcaktimin e termave të kontratës;
- b) Ky zyrtar ka një interes privat, sipas përcaktimeve të nenit 30 të Kodit të Procedurave Administrative.

Neni 8

Neni 18 ndryshon si vijon:

“Neni 18
Prania dhe kufizimi i interesave privatë të personave të lidhur
me zyrtarin

1. Person i lidhur me zyrtarin e AMF-së, për kufizimet e interesave privatë të zyrtarëve, të përcaktuar në nenet 16 dhe 17 të kësaj rregulloreje janë përkatësisht:

- a) Bashkëshorti/ja, bashkëjetuesi/ja fëmijët në moshë madhore, prindërit e zyrtarit e të bashkëshortit/es, bashkëjetuesit/ja;
- b) Çdo person fizik ose juridik, i cili, në lidhje me dhuratën, favorin, premtimin ose trajtimin preferencial, luan rolin e ndërmjetësit a të shkëmbyesit të interesave të lindur nga ky veprim;

2. Ndalimet dhe kufizimet për zyrtarin e AMF-së , të përcaktuara në këtë rregullore, zbatohen edhe për personat e lidhur me të në përputhje me pikën 1 të këtij neni.
3. Përsa i përket kufijve të zotërimit të aksioneve ose të pjesëve në kapital, për zyrtarin e AMF-së dhe personin e lidhur me të, zbatohen drejtpërdrejtë parashikimet e nenit 24, pikat 4 e 5 dhe nenit 35, pikat 2 e 3, të Ligjit nr. 9367, datë 07.04.2005, i ndryshuar.”

Neni 9

Kudo ku në tekstin e rregullores, përmenden:

1. Ligjet e mëposhtme, shtohet fjala “i ndryshuar”:
 - a) Ligji nr. 9572, datë 03.07.2006, “Për Autoritetin e Mbikëqyrjes Financiare”;
 - b) Ligji nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike”;
 - c) Ligji nr. 9049, datë 10.04.2003 “Për deklarimin dhe kontrollin e pasurive të detyrimeve financiare të të zgjedhurve dhe të disa nëpunësve publikë”.
3. Emërtesat “Kryetar” dhe “Nënkryetar”, zëvendësohen përkatësisht me emërtesat “Drejtore i Përgjithshëm Ekzekutiv” dhe “Nëndrejtore Ekzekutiv”.